



2018-imut aningaasanut inatsisissatut siunnersuut (Aningaasaqarnermut naalakkersuisoq)

Aningaasanut inatsisissaq inuiaqatigiinni malunnaateqartussanik imaqartoq ukiullu missingersuusiorfiusut ilanngullugit sinneqartoofiususaaq Naalakkersuisut saqummiuppaat, tamannalu Inuit Ataqatigiinnit iluarisimaarnarpoq.

Pisortani isumaginninnermi isumassuinerit pitsaasumik tunngavissaqassappata Naalakkersuinikkut kommuninilu pitsaasumik ingerlaaseqartoqartariaqarpoq. Isumassuineri sullissisut atugaasa ullumikkornit suli pitsaanerumik tunngavissaqartinneqarnissaat aningaasanut inatsisissami aningaasalerneqarpoq, ilaatigut pineqarlutik:

- najugaq qimannagu inunnik isumaginninnermik siunnersortinngorniarneq ingerlasoq naammassippat nutaamik aallartittoqarsinnaanissaa (decentral socialrådgiveruddannelse)
- isumaginninnermut siunnersortinut ikiortinik ilinniartitseqqinnissaa (rådgivningsassistent)
- psykoterapeutinngorniarnermut aningaasaliisoqassaaq kiisalu supervisor-inngorniarnernut
- najugaq qimannagu pædagoginngorniarneq aammalu pædagogit aqutsisutut ilinniarsinnaanerat aningaasalerneqarluni

Pineqartut ilinniartitaanikkut periarfissatut ingerlaqqinnissaat siunissamut kommunini inunnik isumaginninnikkut sullissinnermut annertuumik kivitseqataasusaanerattut isigaarput.

Ineqarnermut meeqqanullu tapiissutit iluarsartuuteqqinneqarnerat pineqartunut malunnaateqarumaarpoq, siusinaartumik sulisinnaajunnaarnersiutillit sulisinnaanngivissortut aappaasa isertitaat apeqqutaatinnagit tunngaviusumik isertitaqartalerumaarput, taamaattumik aningaasanut inatsisissaq ukiut siulliini aningaasanut inatsisaasartunut sanilliulluni aappaluttuuneruvoq, inuit tikillugit malunnaateqarumaartoq.

Kuultuurilerinnermi annerusumik pikialaartitsisinnaaneq aqutissiuunneqarpoq, nunatta isiginnaartitsisarfiata saniatigut isiginnaartitseqatigiit ataasiakkaat aningaasalerneqarneri sineriatinnut sunniuteqarsinnaajumaarmata nuannaarutigaarput. Film-iliortartut ukiuni makkunani nunarsuatsinnut appakaakkaluttuinnartut annerusumik ineriartorsinnaanissaannik tunngavissikkumallugit aningaasalerneqarnerat siunissami nunatta nunarsuarmi malugineqarneruleriartornissaannitaaq siunertaqarpoq.

Timersortartut nunarput sinnerlugu nunarsuarmi angalasartut atungaasa pitsanngorsaaviginarneqarnerat neriuutigarpur partiit tamarmiullutik taperserumaaraat. Timersorneq ulluinnarni annertuumik pinaveersaartitsiviuvog siunissami annerusumik inerisartariaqarput. Timersornerup annerusumik aningaasalerneqarnerata kinguneranik timersortartut ataasiakkaat nunarput sinnerlugu unammisartuusut ukiukinnerusunit nuannaartorineqarsinnaanerannik aqqutissiuussinerusussaavoq, kinguneranik sunut sunngiffimmi ingalassimaniartariaqartunut aqqutissiuusseqataajumaartoq.

Nunatta siunissamut aningaasarsiornikkut ineriartoqqittariaqarnera aningaasanut inatsisissami sapiissuseqarluni ilusilersorneqarpoq. Inatsisartut siunniussimasaattut takornariaqarnerup siunissami sukarsuit ilaattut inerisarneqartariaqarnera siunertaralugu mittarfiliortiternissami aningaasalersuinissat suleriaqqinnissallu ilusilersorneqarput. Mittarfiliortiternissamik pilersaarutit ingerlateqqinneri soorunami peqqissaartumik Inatsisartunillu peqataatitsilluarluni ingerlanneqarnissaat naatsorsuutigivagut, kinguneriumaagassaanillu qulaajaalluarnikkut alloriaatsit ingerlanneqartarumaartut. Maannamut aningaasalersuinissamik pilersaarutit saqqummiunneqartut suli mianersoqqissaartumik nalilersortariaqarpavut, taamaattoq inuiaqatigiit toqqaannartumik eqqorneqannginnissaannik tunngaveqartumik ilusilersuisoqarmat iluarivarput.

Kommunit kattussuutsinneqarnerini siunertat ingerlariaqqipputtaaq, piginneqatigiilluni illuliortiternerit namminerisamillu illuliortiternerit pillugit akisussaaffik tamakkiisumik kommuninut nuunniarneqarpoq, kinguneranittaaq marloqiusamik allaffissornertaa annikillisarneqassalluni.

Sanaartorneq sineriammi malunnaatilimmik aningaasalerneqarpoq, upperilluinnakkatsinnik sanaartornerup iluani suliffissaaleqinermut iluaqutaajumaartussamik.

Aningaasanut inatsisissami isumaginninnermut aningaasaliissutit annertuut ilaammata iluarisimaarparput, malugalugu nunatta aningaasaqarneranut innarliissutaanngitsumik, taamatut angusaqartoqarsinnaavoq politikikkut piunmassuseqartoqarpat, tamannalu naalakkersuisooqatigiit anersaarimmassuk ersarissarlara. Isumaginninnermili akisussaaffiup pisortaniinnaq inissisimanginnera eqqaamajuassagatsigu pingaartuuvoq, soorlu ippassigami musikvideo 'Ullorissat' saqqummersinneqarmat suleqataasut oqaaseqartut ima nipilimmik:

- *"Kommuninut nalunaarusiat siunnerfippur allamut sangutissanngilaat, tassalu naggataani uagut inersimasut angajoqqaallu meeqqanut akisussaaffik annertoq tigummissagippur pingaaruteqarpoq, uagullu suaaruteqartussaasugut. Nipilersukkap meeraq ataasiinnarluunniit inersimasumik ikiortissarsiortissinnaappagu nipilersukkap anguniakkani angusimassavaa"*

Aningaasanut inatsisissap suliarinerani naalakkersuisooqatigut Siumut aamma Parti Naleraq suleqatigiilluarsimanitsinnut qutsavigiumavavut, illuatungiliuttullu Demokraatit attaviitsorlu mininnagit qutsavigaagut.

Taamak oqaaseqarluta aningaasanut inatsisissap akuerineqarnissaanut taaseqataassugut.